

## Incumbensa Bigliel concernent la digitalisaziun da las proceduras per la permissiun da construcziun

Tgi che planisescha ina midada da construcziun, è savens malsegir, sch'el dovra ina permissiun da construcziun. Entant ch'i dovra da princip ina permissiun da construcziun per projects pli gronds che han consequenzas sin l'urden d'utilisaziun tenor l'art. 86 LPTGR, ston per part er projects da construcziun pli pitschens vegnir annunziads a la vischnanca cumpetenta e laschads controllar da tala. Uschia dovra gia la nova pictura da la fatschada d'in edifizii ina permissiun, sch'ella vegn fatga en in'autra color che quella vertenta. Uschia na dovri ina permissiun da construcziun betg mo en cas da projects da construcziun pli gronds, mabain gia en cas d'ina midada d'utilisaziun. Tuttina chaschunan talas midadas, per part pitschnas, blera lavur per la petenta u il petent d'ina permissiun da construcziun. Pertge che: lavurs betg permissas ston vegnir refatgas en il mender cas, e quai sin donn e cust da la petenta u dal petent. Quai chaschuna tut tenor er lavur da vart da l'administraziun e maina a retards en il process da permissiun.

Cun la digitalisaziun da la procedura per la permissiun da construcziun po l'inoltraziun da novs projects vegnir simplifitgada e rendida transparenta per tut las parts partecipadas. Plinavant vegnan uschia sbassads a lunga vista ils custs da vart da la petenta u dal petent sco er da l'administraziun e promovida ina inoltraziun pli efficazia da novs projects. Quai na duai betg sco ultim simplifitgar l'activitad da construcziun e reducir ils custs da construcziun sco er da l'administraziun.

**Il chantun Berna ha percurschì il basegn da las burgaisas e dals burgais per in sistem che sa basa sin l'internet e planisescha da liquidar permissiuns da construcziun a partir da l'onn 2020 mo pli sin via electronica. Quai è il resultat d'ina moziun ch'è vegnida acceptada unanimamain dal cussegl grond bernais.** Tenor la communicaziun da la regenza dals 9 da mars 2018 sa laschan uschia spargnar 3,5 milliuns francs mintga onn. **Cun l'introducziun da la procedura electronica per la permissiun da construcziun duain ils process vegnir liquidads en l'avvenir en moda pli svelta, pli economica e pli ecologica.** En il chantun Turgovia pon ins observar in svilup sumegliant. A partir da l'onn 2019 duai il project chantunal «eBaugesucheZH» simplifitgar la procedura per la permissiun da construcziun e render quella pli cumadaivla per la burgaisa u il burgais. La basa è ina plattafurma electronica centrala che renda accessibels ils programs administrativs da construcziun decentralas da las vischnancas e che baratta las datas da las dumondas da construcziun sur ina interfatscha standardisada (eCH-0211) ch'è vegnida sviluppada aposta or da quest project. Las vischnancas ed il chantun restan uschia autonomas e pon lavurar vinavant cun lur programs administrativs da construcziun.

Questa intervenziun sa metta en retscha cun las stentas da l'incumbensa Casanova-Maron (Domat) concernent in "Grischun digital" che vesa la digitalisaziun sco instrument per concepì process administrativs en moda pli economica sco er pli cumadaivla per las utilisadras ed ils utilisaders.

Las sutsegnadras ed ils sutsegnaders incumbenschan la regenza d'examinar, co che la procedura per la permissiun da construcziun possia vegnir digitalisada uschè ferm sco pussaivel per reducir la lavur ed ils custs tant per las petentas ed ils petents sco er per l'administraziun – en spezial cun observar las soluziuns che vegnan empruvadas actualmain en ils chantuns Berna e Turgovia.

Cuira, ils 13 da favrer 2019

**Bigliel, Hohl, Rettich, Alig, Atanes, Baselgia-Brunner, Berweger, Brandenburger, Brunold, Caluori, Cantieni, Caviezel (Cuira), Caviezel (Tavau Clavadel), Claus, Della Cà, Deplazes (Cuira), Derungs, Dürler, Engler, Felix, Flütsch, Gasser, Gort, Hartmann-Conrad, Hitz-Rusch, Holzinger-Loretz, Horrer, Kappeler, Kienz, Koch, Kunfermann, Kunz (Fläsch), Kunz (Cuira), Kuoni, Locher Benguerel, Loepfe, Mittner, Müller (Favugn), Niggli (Samedan), Perl, Pfäffli, Preisig, Rüegg, Rutishauser, Stiffler, Thomann-Frank, Thür-Suter, Tomaschett (Breil), von Ballmoos, Weber, Weidmann, Wieland, Wilhelm, Holliger, Lunghi**